

## **Årsmelding for Øvre Naustdal Utmarkslag 2025 – til årsmøtet 18.03.2026.**

Historikk for årsmøter i ØNU sidan 2010 med viktige vedlegg er å finne på nettsidene vår her:  
<http://kringlen.com/onu-underside-aarsmote.html>

**Styret** har i 2025 vore samansett slik:

Normund Svoen – leiar

Odd Vonen – nestleiar

Anders Neset – sekretær/storvaldkontakt

Gudmund Eimhjellen – styremedlem/storvaldkontakt

Narve Fimland – styremedlem/storvaldkontakt

**Varamedlem:**

Are Svorstøl

Inge Svorstøl

**Revisorar:**

Olav Svoen

Ruth Signe Bruflot

**Valnemd** til årsmøte 2026

Are Svorstøl – leiar

Arne Dvergsdal

**Rekneskapet** er ført av Karen Marie Elvik Svoen

### **Styremøter**

I løpet av 2024 har vi hatt 2 styremøter. Det har også som før om åra vore kommunikasjon over telefon, tekstmeldingar og epost. Det meste av aktiviteten vår har vore kommunisert over Facebook-sida til ØNU - <https://www.facebook.com/groups/536166676475053> og noko på tekstmelding til medlemmane.

**Arrangement/ Prosjekt som laget har vore inne i siste året:**

### **Årsmøte.**

Arrangering av årsmøte 05.03.25 – Fimlandsbua – som dei siste åra også med storvaldsaker. 10 medlemmer møtte.

### **Fiskekortsalg og båtutleige.**

Båtane har vore flittig i bruk store deler av sesongen – både i Svo-/Nesvatnet og i Vonavatnet. Også i 2025 har Utmarkslaget tatt ansvar for utsetting, innsetting og lagring av Barnas Turlag sine 2 kanoer i Vonavatnet og 4 H sine 2 kanoar ved Svobrua. Nauatdal jakt og fiskelag har hatt sin båt ved Svobrua som året før til allmenn nytte.

### **Betalingsparkering ved parkeringsplassar ved Vonavatnet, Øyjord, Svobrua og Svosvingen.**

Framleis god oppslutnad om betalingsparkeringa som utgjer ei viktig inntekt for laget. Vi får betalt ut både for grunnleige ved Vonavatnet, og brøyting ved Øyjord, Svobrua og Svosvingen -jfr rekneskapen. Overskotet brukast saman med inntekter for fiske og båtutleige til å dekke andre utgifter for laget og til å bygge opp ein bufferkonto for dekning av uforutsette utgifter. Det aller meste av innbetalingane skjer på Vipps. Parkeringsavgiftene blei heva i 2025 og det visest også igjen på rekneskapen. Det er ikkje komme klage på storleiken av parkeringsavgiftene.

### **Tynningsfisket i Vonavatnet**

Ola Kringlen har ansvar for koordinering av tynningsfisket i Vonavatnet og gjer ein avgjerande og stor jobb med dette. Vi er framleis også heilt avhengig av den hjelp vi får frå Ingebrigt Tveite og Ingrid Våle for tynningsfisket i gytetida.

Som kjent blei Vonavatnet svært tidleg isfritt i 2025. Allereie i påska kunne ein gå med båt over vatnet...! Dugnadsfisket foregikk 07.- 08.06 og 27.-28.09. I tillegg sjølvsgatt nokre private garn der kun eit fåtall av desse blei rapportert inn fangst for. Det som er rapportert frå 2025 (og som sjølvsgatt er det aller meste) er:

Antal garndøgn i 2025 var 447, fangst 4945 – av desse 59% røyr og 41% aure. Den beste fangsten på fleire år og god utteljing på røyr iom at garnsettinga foregikk i beste gytetida for røyra. For detaljer sjå vedlegga på nettsidene.

### **Trekning av reinsdyrløyver og reinsdyrjakta 2024.**

Arne Dvergsdal som også er leiar av Villreinutvalget i Førdefjella villreinområde, har framleis ansvaret for å følge opp ØNU sine interesser når det gjeld villreinjakta i vårt område. Han deltek i møter, held orden på tildeling av løyver, organiserer trekning blant våre medlemmer, rapportering om avskyting etc.

Trekning av våre løyver for jakta 2025 blei gjort 19. juli. Vi hadde fått tildelt to løyver og det blei felt eit dyr.

Dyra var vanskelege å finne i år iom at dei fleste gikk på Jølster/Gloppen sida.

Sjå elles <http://www.villrein.no/frdefjella-2/>

### **Småviltsituasjonen.**

Rune Olsbø ved Florø jeger og fisk driv framleis aktiv undersøking i området vårt med årlege takseringstrapporatar. 2025 med taksering kun i Nes området viste ein for låg kyllingproduksjon til at det kunne gjennomførast jakt. Uttak av predatorar har fortsatt. Ein omfattande rapport ligg på nettsidene våre.

### **Stiprosjektet.**

I 2025 blei det sett opp ei gangbruk over Fagredalselva på stien til Gjengdalskaret/Maristeinen. Stien krysser elva i stølsmarka og det kan vere utfordrande under snøsmelting og ved mykje regn å forsere elva.

Utmarkslaget sendte søknad om midlar til bestillingsdialogen for Landskapsvernområdet og fekk dekka kostnader til materialer, helikoptertransport, maksinarbeid, anna nødvendig utstyr samt dugnadslønn til nokon av dei som deltok. Ein liten del av kostnaden blei dekka av oss – sjå rekneskapan. Takk til Arne Dvergsdal som nok ein gang var prosjektleiar for eit av Utmarkslaget sine mange prosjekter.

### **Hjortejakt**

Jaktåret 2025 var femte sesongen etter samanslåinga av Utmarkslaget og Instedalen Storvald. Det er Gudmund Eimhjellen, Anders Neset og Narve Fimland som har hovudansvaret for hjortesaker i styret.

Det blei arrangert jaktfeltleiar møte før hjortejakta i august der info om jakta blei gitt, løyvetildeling, avgifter etc. I tillegg blei det sendt ut detaljert info på tekstmelding til jaktfeltleiarane og informert på Fb sidene våre.

All jakt samt sette og skutte dyr skal rapporterast elektronisk på «Sett og skutt» (Hjorteviltregisteret). Styret har følgd med på rapporteringa i løpet av hjortejaktperioden. Rapporteringa har stort sette vore god dei siste åra.

Fellingsstatistikk har med jevne mellomrom vore lagt ut på «Hjortebørsen» på Fb sidene våre. All informasjon er henta frå Hjorteviltregisteret som lagrar alle data innrapportert av jegerane på «Sett og skutt». Jakta og fellingane er tillitsbasert. Med unntak av felling av skrapdyr som går utanom kvoten er der er ingen annan kontroll med fellingane enn det som blir ført på «Sett og skutt». Fellingane skal rapporterast kontinuerleg!

Den årlege kvoten for Instedalen Storvald fom 2023 blei auka frå 50 til 65 dyr. Sjølv om antall fellingar dei siste par åra er monalege høgre enn før vil ein likevel i Instedalen Storvald ikkje vere i stand til nå det årlege fellingsnivået på 65 dyr. I 2025 blei det felt 38 dyr. Til samanlikning blei det i 2024 felt 45 dyr og i 2023 – 40 dyr. Tidlegare år knapt 30 dyr. For å betre totalavskytinga vil jaktfelt som fyller sin jaktkvote på enkel måte kunne søke om tilleggsløyver på ungdyr og kalv.

### **ØNU sin administrasjon av løyve til scooterkøyring i LV området.**

Fleire grunneigarar nyttar transportløyvet gitt av Naustdal-Gjengedal verneområdestyre og som ØNU administrerer på vegne av områdestyret for transport til hytter/stølar og utkøyring av saltstein i LV området. Vi fekk i 2025 nytt løyve til å disponere 10 turar pr år som gjeld for perioden 2025 – 2028 - 1. januar til 31. mars desse åra. Grunneigarane har sett pris på ordninga som vi på kort varsel enkelt ordner via tekstmeldingskommunikasjon med den enkelte grunneigar.

### **Økonomi**

Rekneskapan viser at vi i 2025 fekk inn kr 42010,- på fiskekort/båtleige og parkering mot kr 31332 i 2024 og kr 23374 i 2023 – nesten ei dobling på to år. Auken i fjor beror nok delvis på auke i parkeringsavgift men trafikken og bruken av våre tilbod aukar år for år - og det er bra! Dei fleste innbetalingane skjer via Vipps.

Saldoen på **driftskonto** ved utgangen av året 2025 er kr 58671,- - kr 2109 mindre enn ved inngangen på året. På **storvaldkontoen** er saldoen ved utgangen av året kr 20585,- - kr 1097,- mindre enn ved inngangen på året.

**Kommentar:** Sjølv med stabil økonomi der inntekter stort sett balanserer utgifter må vi likevel tenke inntekter og begrense utgifter når dette er nødvendig. Det viser seg at det er lett å få tildelt midlar når vi har gode prosjekt å søke på, og spesielt når vi kan gå saman med andre i bygda på prosjekt med felles interesse (td. Grindbygget i 2022, parkeringsplassen 2023-24, bruer etc) ) Elles har jo Utviklingsfondet og bestillingsdialogen vore gode økonomiske samarbeidsparter. Tynningsfisket i Vonavatnet medfører årlege utgifter for oss på omkring kr 20000,- og vi må sikre inntekter som kompenserer dette. Dessutan er det stor slitasje på båter med utstyr som må vølast og fornyast.

Sjå elles eiga sak på årsmøtet vedr økonomi ved gjennomgang av rekneskapan med revisjon av denne.

### **Deltaking i nemder og utval.**

**Rådgivande Utval** i Naustdal/Gjengedal landskapsvernområde

Styret i Utmarkslaget er ved leiar representert i Rådgivande utval med nestleiar som vara <http://www.nasjonalparkstyre.no/Naustdal-Gjengedal/>

**Fondsstyret** for Utviklingsfond for Naustdal-Gjengedal landskapsvernområde

Utmarkslaget har etter at Sunnfjord kommune blei oppretta ikkje hatt eigen representasjon i fondsstyret, men Olav Svoen er valgt som 1. vara - <https://gloppen.kommune.no/tenester/landbruk/utmark/utviklingsfondet-naustdal-gjengedal/>

**Villreinutvalget** – Førdefjella villreinområde. Arne Dvergsdal er leiar i utvalget og samtidig Utmarkslaget sin representantant. <http://www.villrein.no/frdefjella-2/>

**Villreinnemda** for Sogn og Fjordane. Utmarkslaget har ingen medlem i nemda men Sunnfjord kommune har valgt ein representant som representerer heile storkommunen. <https://www.villrein.no/sogn-og-fjordane-nemnd>

**Prosjekt/drift** som Utmarkslaget arbeidde med i 2025 og som blir vidareført i 2026 er:

Vedlikehald og overvåking tynningsfisket i Vonavatnet. Utfisking i 300-400 garndøgn pr år med småmauska garn på ubestemt tid er nok nødvendig for å unngå ny overbefolkning av vatnet.

Styrevedtak på at ein set igang ei utgreiing vdr oppsetting av eit skjul/naust for båtane til ØNU ved Vonavatnet. Det er i første omgang teke kontakt med grunneigarane og så blir saka tatt derfrå.

Vedlikehold av stimerking i ØNU sitt område.

Småviltkartlegging i ØNU sitt interesseområde

Dagleg drift med vedlikehold av Svobrua Friluftsområde, brøyting av parkeringsplassar, oppslag om fiskekort, parkeringskasse ved Vonavatnet, vedlikehold av båtar, opprigging av utstyr om våren og nedrigging om hausten (båtar, kanoer, bord og benker, garn, parkeringskasser etc), kommunikasjon med kommune og administrasjonen for LV området bl.a. med uttale i forbindelse med søknader om motorisert ferdsel, delegert mynde for scootertransport i LV området for grunneigarar, løypekøyering, bygg og anlegg i ØNU sitt interesseområde.

Ivareta alle forhold omkring hjortejakta, bl.a. møte med jaktfelleiarane, diverse tiltak som kan fremme grunneigarane sine interesser omkring hjortejakta, overvåking av «Sett og Skutt» og passe på at rapporteringa skjer slik den skal. Planlegging av kurs der forslag om slikt blir fremja.

Administrasjon av reinsdyrjakta for ØNU sine grunneigarar i Førdefjella Villreinområde

For meir info sjå nettsidene <http://www.kringlen.com/ONU.html>

Viser også til Øvre Naustdal Utmarkslag si Facebook gruppe - <https://www.facebook.com/search/top/?q=%C3%B8vre%20naustdal%20utmarkslag>

Vi takker nok ein gong Ola Kringlen for leiing av tynningsfisket og overvaking av fiskesituasjonen i Vonavatnet samt bidrag til å legge ut viktig info på ØNU si nettside under Vonaportalen. Vi må også legge til at styremedlemene i Utmarkslaget legg ned eit betydeleg dugnadsarbeid for laget – både praktisk og organisatorisk. Elles vil vi takke dei av våre medlemmer som har vore med på tynningsfiskedugnaden og i dugnadsarbeid elles i laget.

Florø 13.03.26.

For styret i ØNU,

Normund Svoen

Leiar.